



**Sud Bosne i Hercegovine**  
**Суд Босне и Херцеговине**

---

*Broj: SI 3 Iž 030578 18 Iž*  
*Sarajevo, 02.10.2018. godine*

*Sud Bosne i Hercegovine u Sarajevu, u apelacionom upravnom vijeću sastavljenom od sudija, Srete Crnjak, predsjednika vijeća, Dinke Bečlagić-Čovrk i Vesne Trifunović, članova vijeća, odlučujući o žalbi Svetozara Pudarića, Zmaja od Bosne 32, Sarajevo, izjavljenoj protiv odluke Centralne izborne komisije Bosne i Hercegovine, broj: 05-1-07-3-337/18 od 21.09.2018. godine, u pravnoj stvari povrata uplaćenih sredstava na ime takse za ovjeru nezavisnog kandidata, u nejavnoj sjednici održanoj dana 02.10.2018. godine, donio je*

*R J E Š E N J E*

***Žalba se odbija.***

*O b r a z l o ž e n j e*

*Odlukom Centralne izborne komisije Bosne i Hercegovine, broj i datum navedeni u uvodu, žalitelju, odbačena je žalba Pudarić Svetozara iz razloga što j pravomoćnom odlukom CIK-a BiH odbijena prijava žalitelja kao nezavisnog kandidata za učešće na Općim izborima 2018. godine.*

*Žalitelj je blagovremeno uložio žalbu na navedenu odluku zbog povrede pravila postupka, nepotpuno i nepravilno utvrđenog činjeničnog stanja i pogrešne primjene materijalnog prava.*

*U žalbi, navodi da povredu pravila postupka vidi u činjenici da CIK nije naveo procesni osnov za odbacivanje, jer je trebao donijeti odluku o prihvatanju ili odbijanju podneska.*

*Članom 4.16 Izbornog zakona BiH regulisano je pravo na povrat novčanog iznosa na ime takse za ovjeru nezavisnog kandidata za učešće na izborima, ali nema ograničenja prava na povrat takse za one kandidate čiji je zahtjev za ovjeru prijave odbijen.*

*Zato je predložio da Apelacioni odjelu Suda BiH usvoji žalbu i predmet vrati na ponovno odlučivanje.*

*Centralna izborna komisija BiH je u odgovoru na žalbu predložila da se žalba odbije kao neosnovana.*

*Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.*

*Žalbom se osnovano prigovara da je Centralna izborna komisija BiH trebala odlučiti da li je žalba osnovana ili ne, jer nema procesnih uslova za odbacivanje. Naime, tačno je da je žalitelj odbijen sa prijavom kao nezavisni kandidat za učešće na Općim izborima 2018. Godine. Međutim, kako u konkretnom slučaju žalba nije osnovana, a ista je pravna posljedica i u situaciji kada je odbačena, to ne utiče na zakonitost i pravilnost pobijane odluke.*

*Zbog navedenog, apelaciono vijeće Suda Bosne i Hercegovine je zaključilo da je rješenje CIK BiH pravilno i zakonito donijeto, odnosno da žalba nije osnovana, jer podnosilac žalbe nije mogao učestvovati na Općim izborima 2018. Godine, , pa ne ispunjava zakonske uslove predviđene odredbom člana 4.16 Izbornog zakona BiH za povrat novčanog iznosa predmetne takse.*

*S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, broj: 19/02 do 74/10) valjalo odbiti.*

**PREDSJEDNIK VIJEĆA**  
**S U D I J A**  
**Sreto Crnjak**